

TEZAUUR LITURGIC

19 MARTIE

ACATISTUL SF. CUVIOASE VASSA DE LA PSKOVO- PECERSKA



MOSCOVA, 2000

Акафист преподобной Вассе Псково-Печерской

Кондак 1

Избранней от мирскаго жития на подвиг иноческий спасительный, утешению и радости верных, преподобней Вассе похвальная восписуем пения. Ты же внемли недостойным мольбам нашим, донеси прилежне до Царя славы и Господа, да со умилением зовем ти сице: Радуйся, преподобная мати Вассо, помощнице наша прерадостная.

Икос 1

Ангельстии лица возрадовашася ти, егда родишася в мир сей, ведяще тя предъизбранную для подвигов и добродетелей. Мы же, обретше тя добродетельную помощницу и молитвенницу, взываем ти сице:

Радуйся, возрадовавшая рождением родителей твоих.

Радуйся, ангельские усладиша очеса.

Радуйся, красотю души измлада богатая.

Радуйся, детский трепет души посвятившая Богу.

Радуйся, Духа Святаго в крещении приявшая.

Радуйся, печатю дара Духа Святаго
назnamenованная.

Радуйся, отрекшаяся сатаны и всех дел его.

Радуйся, во Христа облекшаяся.

Радуйся, истинную веру устами восприемника
исповедавшая.

Радуйся, ризою светлою одеявшаяся.

Радуйся, с пострижением власов нечистоту
греха отчуждившая.

Радуйся, преподобная мати Вассо, помощнице
наша прерадостная.

Кондак 2

Видяще родители, яко дщи родися преславная,
возблагодариша Бога, даровавшего такую
милость верным и воспеша от всея души:

Аллилуиа.

Икос 2

Разум даровася тебе от Бога, егда бо еще молодою
отроковицею благочестию и молитве научена
была еси. Ты же, яко пчела, мед добродетелей
собирала еси. Сего ради прими от нас пения
сия:

Радуйся, от юности в благочестии воспитанная.

Радуйся, возлюбившая Бога всем сердцем
своим.

Радуйся, в любви к ближнему
совершенствовавшаяся.

Радуйся, родителей своих почитавшая.

Радуйся, послушанием приносившая им
радость.

Радуйся, очеса твоя кротостию украшашеся.

Радуйся, руке твоей на добродетели
простирахуся.

Радуйся, ноге бо твоей шествоваху незаблудным
путем.

Радуйся, и нас научающая сим добродетелем.

Радуйся, в скорбех отрадо наша.

Радуйся, в молитвах прибежище верных.

Радуйся, преподобная мати Вассо, помощнице
наша прерадостная.

Кондак 3

Сила Господня осени тя, егда подвижашеся на
добродетели, вразуми бо тя Господь, да
украшиши житие твое, аки камнями
драгоценными, милосердием, братолюбием и
кротостию, и воззовеши Богу: Аллилуиа.

Икос 3

Имуще богатство неисчислимое в сердце своем,
сложенное от юности, востекла еси ко
супружнику твоему Иоанну и прельсти его сим

богатством, да видяще восприемлет тя на брак честен. Сего ради зовем ти:

Радуйся, с чистотою тела и чистоту души соблюдающая.

Радуйся, с добродетельным Иоанном в брак честен вступившая.

Радуйся, добродетельной супружницей явившаяся.

Радуйся, в таинстве брака благодать получившая.

Радуйся, с сею благодатию преславне пожившая.

Радуйся, славою и честью венчавшаяся.

Радуйся, к сему житию путеводящая.

Радуйся, помощнице брак честен соблюдающим.

Радуйся, наказательнице неверных жен и мужей.

Радуйся, верных Христови обручающая.

Радуйся, неверных от своея помощи отревающая.

Радуйся, преподобная мати Вассо, помощнице наша прерадостная.

Кондак 4

Бурею естества человеческого повергшися ко греху, яко адамант тверд была еси, с сокрушением в покаянии очищала еси себе от

зол мира сего и добродетельми блистала яко заря солнечная, ликуя вопия Богу: Аллилуиа.

Икос 4

Слышаша людие о тебе, преподобная, яко вельми добродетельми украшена, стекахуся к тебе, да почерпают от сего источника благодати. Егда же утешение получаху, согласно взываше к тебе:

Радуйся, луно, светящая в нощи греховней сущим.

Радуйся, звездо, ведущая к добродетели.

Радуйся, напитавшая алчущаго.

Радуйся, напоившая жаждущаго.

Радуйся, приявшая страннаго в своя обители.

Радуйся, согрешшая во мразе сущих.

Радуйся, заповедем Божиим сопричастнице.

Радуйся, добродетели всякия правило.

Радуйся, смиренном обличенная.

Радуйся, кротостию украшенная.

Радуйся, сладкоуханная цевнице.

Радуйся, преподобная мати Вассо, помощнице наша прерадостная.

Кондак 5

Боготечная звезда была еси, сияя супружнику твоему Иоанну, егда сан иерейский прияша,

разделяше бо житием твоим вся красоты и скорби пастырского его подвига, непрестанно вопия: Аллилуиа.

Икос 5

Видеша ближнии и дальнии честную двоицу добродетельную во спасении и трудех жительствующую, вознесоша благодарный глас свой к Богу и воспеша сия:

Радуйся, всеблагая печальнице иерея Божия.

Радуйся, блистающая светом Отчим.

Радуйся, труды пастырства разделявшая житием своим.

Радуйся, светильниче, освещающий скорбный путь.

Радуйся, премудростию венчанная.

Радуйся, иерею Божию сопутствовавшая.

Радуйся, сладость пресвитера восприемлющая духом.

Радуйся, благоговейно внимавшая глаголом живота.

Радуйся, сердце свое жилищем Бога соделавшая.

Радуйся, в Бозе и для Бога жившая.

Радуйся, светом веры и нас озаряющая.

Радуйся, преподобная мати Вассо, помощнице наша прерадостная.

Кондак 6

Проповедницы людие быша егда о подвизах преподобнаго Марка рекоша и на стогны града Пскова молву донесше, возвестиша бо о добродетельном житии его и подвизах. Мы же ведуще сия, велегласно зовем: Аллилуиа.

Икос 6

Возсиявше житие преподобнаго Марка в земли Псковстей и стекахуся в пустыню Печерскую тщащияся жития иноческаго. Тако и ты, преподобная, со супругом твоим востекла еси в леса и дебри Печерстии, бегая мира лукавствия. Сего ради прими от нас похвалы сия:
Радуйся, прелесть мирскую оставившая.
Радуйся, к иноческому деланию прибегшая.
Радуйся, преподобным Марком умудренная.
Радуйся, его наставлением внимавшая.
Радуйся, подвиги его лицезревшая.
Радуйся, мира тленнаго не возжелавшая.
Радуйся, твоему супругу подражавшая.
Радуйся, дებрьми и лесом не уstraшенная.
Радуйся, злокозненные наветы диавола победившая.
Радуйся, Ангелов теми возвеселившая.
Радуйся, со Ангелы во славе небесней ныне ликуеши.

Радуйся, преподобная мати Вассо, помощнице наша прерадостная.

Кондак 7

Хотяще оставити мир сей, востече честная двоица к преподобному Марку, и ту водворися на подвиги, облагоухашеся молитвами преподобных дебри, еже при потоце Каменце, в пещерах же Богом зданных учредишася церковь, в нейже согласно пояху иноцы: Аллилуиа.

Икос 7

Новую и преславную силу изведаша двоица честная, приобщившись чину иноческому и пострижение прияша, подвиги бо усугубиша в лесах и пропастьех земных. Мы же ведуще сия глаголем:

Радуйтесь, иноческаго жития ревнителие.

Радуйтесь, пострига монашескаго возжелавшии.

Радуйтесь, в постриге Богу себе всецело предавшии.

Радуйтесь, плоть свою трудами томившии.

Радуйся, Иоанне — Ионой нареченный.

Радуйся, житию пророка Ионы подражавый.

Радуйся, в пещерах яко во чреве китове пребывавый.

Радуйся, яко чрево земли бысть тебе отрадою.
Радуйся, и супружницу твою Христу обручивый.
Радуйся, Вассо, блаженная – подражательнице
супругови.

Радуйся, подобно ему, в недрах земли
молившаяся.

Радуйся, всех благ земных Христа ради
лишившаяся.

Радуйся, преподобная мати Вассо, помощнице
наша прерадостная.

Кондак 8

Странное и преславное чудо слышаще
зверолови, пришедше на святую гору, и гласи
пений иноческих уловивше из земли, страхом
объяты бывше, поведаша людем о сем и
возопиша Богу: Аллилуиа.

Икос 8

Вся бе небесным взята, преподобная, но и на
земли усердно подвизашеся, и в иночестем
делании упраждняшеся. Сего ради прими и от
нас похвалы сия:

Радуйся, правила монашеския возлюбившая.

Радуйся, молитвою к Богу всегда пламенеющая.

Радуйся, обеты иночества Богу принесшая.

Радуйся, послушание паче укрепившая.

Радуйся, сему дару и нас научающая.
Радуйся, нестяжание приобретающая.
Радуйся, от корысти и скверноприбытчества нас ограждающая.
Радуйся, сладость молитвы познавшая.
Радуйся, сею пищею и нас питающая.
Радуйся, пустынное житие предпочетшая.
Радуйся, в двери рая с преподобным Ионою возшедшая.
Радуйся, преподобная мати Вассо, помощнице наша прерадостная.

Кондак 9

Всяких сил небесных ныне являеши
сопричастницей, святая и преподобная Вассо,
предстоиши бо у престола Божия и непрестанно
молишися за ны, вопиющая Богу: Аллилуиа.

Икос 9

Витии многоглаголивии не могут изрещи
подвиги и труды твоя, како женское естество
отвергше, суровому пустынноческому житию
востекла еси. Мы же, ведуще силу Господню,
воскликнем ти:

Радуйся, Господня избраннице.
Радуйся, небесных селений достигшая.

Радуйся, любовь твою обильно на нас проливающая.

Радуйся, весь Печерскую освятившая своим пребыванием.

Радуйся, подвиги твоими и нас вдохновляющая.

Радуйся, ведущая нас на небо.

Радуйся, всем прибегающим к тебе скоро помогающая.

Радуйся, заблудших незримо вразумляющая.

Радуйся, утешение наше присное.

Радуйся, пустыни тезоименитая.

Радуйся, пустынное житие являющая.

Радуйся, преподобная мати Вассо, помощнице наша прерадостная.

Кондак 10

Спасти хотя род человекъ, Человеколюбец Господь, дарова нам помощницу в бедах и обстояниих, скорбех и печалех, о преподобная Вассо, да всяк возраст утешен будет и в радости воскликнет: Аллилуиа.

Икос 10

Стена еси верным и сладкая отрада. Сего ради присно зряще на образ твой радуемся грешнии и со дерзновением восклицаем:

Радуйся, радости наша любезная.

Радуйся, мати всем крова лишенным.
Радуйся, одеждею нас снабдевающая.
Радуйся, всегда Бога о нас умоляющая.
Радуйся, иноком присная помощь.
Радуйся, в подвизех иночестих утверждающая.
Радуйся, страстей и наветов плоти
отгонительнице.
Радуйся, в крестоношении нам помогающая.
Радуйся, молитве незримо научающая.
Радуйся, в сладость молитву нам претворяющая.
Радуйся, в подвизе поста укрепляющая.
Радуйся, преподобная мати Вассо, помощнице
наша прерадостная.

Кондак 11

Пение хвалебное прими от нас, преподобная
мати, вземли молением нашим, защити нас от
всякаго зла, сохрани град сей и обитель, да
будет верным утешение и прибежище, идеже
возможем пети: Аллилуиа.

Икос 11

Светоприемная свеща бысть житие твое,
преподобная! Сего ради Господь нетлением тя
прослави и ныне пречестную раку мощей твоих
зряще, тебе восклицаем:
Радуйся, нетлением почтенная.

Радуйся, Царства Небеснаго наследнице.
Радуйся, во врата узкия вшедшая.
Радуйся, ныне с Богом беседующая.
Радуйся, Христу сораспятая.
Радуйся, слезами покаяния себе омывшая.
Радуйся, слезы молитв твоих обратися в радость.
Радуйся, вельми чадолюбивая ко грешным.
Радуйся, о гресех за сих чад усердно умоляющая.
Радуйся, сердце каждого зрящая.
Радуйся, доброе намерение целующая.
Радуйся, преподобная мати Вассо, помощнице наша прерадостная.

Кондак 12

Благодать ти дана от Бога милостию посещати чад обители твоея, на месте, идеже ты житие монашеское провождала. Мы же ведуще сие и радующеся прилежне в умилении восклицаем Богу: Аллилуиа.

Икос 12

Поюще тя, преподобная мати Вассо, не возможем песен достойных составить ко прославлению имене твоего честнаго, токмо на любовь твою надежду возложим, да восхвалим тя пении сими:

Радуйся, житием своим Бога воспевшая.
Радуйся, питающая нас хлебом небесным.
Радуйся, девства страж неусыпный.
Радуйся, иноков вельми возлюбившая.
Радуйся, места сего страж неусыпный.
Радуйся, града Печер оплот верный.
Радуйся, Псково-Печерския обители украшение.
Радуйся, рака твоя ныне зрима есть.
Радуйся, фимиаме молитв усердный.
Радуйся, ты бо вся прошения наша слышиши.
Радуйся, николиже нас оставляеши.
Радуйся, преподобная мати Вассо, помощнице
наша прерадостная.

Кондак 13

О, преподобная и всехвальная мати Вассо!
Обители Псково-Печерския инокине! Внемли
милостивно молением нашим и вся прошения
наша исполни, да восхвалим Бога песнию:
Аллилуиа.

(Этот кондак читается трижды, затем икос 1 и
кондак 1)

Молитва

О, всехвальная и преподобная мати наша Вассо!
Сосуде Богом избранный, и аки камнями
драгоценными добродетельми украшенный!

Обители Псково-Печерския красото и славо:
жития иноческаго утверждение и правило. К
тебе ныне припадаем и со слезами колена
сердца нашего пред ракою мощей твоих
преклоняем, мощи твоя любезно чествуем и
вельми радуемся, зряще благоуханное и
праведное тело твое, никогда же покидающее
ны, но на всяк день и час в честней раце
пребывающее, во граде и обители сей на радость
верным. Темже из глубины души к тебе
взываем: внемли недостойным молением
нашим: услыши глас сирых рабов твоих, в
горцех прошениях к тебе приникших, исполни
их скоро. Буди любящая мати к скорбящим
чадом и прошения наша скоро вознеси в
Небесное Царство, к подножию ног Господа и
Спасителя нашего. Ты в благочестии и вере
воспитанная, даруй нам, да и мы твердо
держим веру нашу православную и
благочестием украшаемся. Ты супружницею
благоговейнаго Иоанна ставшая и во браце
спасение почерпшая, егда же супруг твой
пресвитером соделася добре стадо свое
управляя, тогда ты в пастырских трудах ему
усердно помогаше житием твоим праведным,
яко звезда сияя в нощи греховней сущим, и
скорби и радости его непрестанно разделяя!
Сего ради и всем сущим в брачном житии,

помози спасение улучшить, в мире и единомыслии житие проводить, брак честен и ложе нескверно блюсти. Ты брачному житию монашеское предпочесть, на склоне лет твоих вместе с супружником твоим стопы в весь Печерскую к водам потока Каменца направившая, да тамо вкупе с преподобным подвижником Марком в делании иночеством подвизаетесь! Помози и нам нозе наша к добродетели направляти и всегда от прелести мира сего на спасительное делание тщатися, да омыют и наша беззакония и грехи спасительныя воды молитв и подвигов. Ты с супружником твоим вкупе чин монашеский приявшая и скорби жития иноческаго понесшая, даже до смерти твоея, тщаливо Богу работая, да стяжеша венцы небесныя! Умоли Бога, да и мы в подвизах иноческаго делания укрепимся и вся скорби и тяготы на радость преложим, да наследим и мы венцы небеснии твоею помощию и молитвами о нас, чадах твоих, восхваляюще Всеблагаго Бога, даровавшаго таковую заступницу верным, ныне и в безконечныя веки. Аминь.